

7  
O R A I S O N  
F V N E B R E,

SVR LA MORT DE  
LOVIS LE IVSTE,

PRONONCEE  
DEVANT L'ASSEMBLEE  
DES ESTATS GENERAVX DE LA  
PROVINCE DE LANGVEDOC, DANS  
l'Eglise Cathedralle St. Pierre de Montpellier.

PAR LE R. P. CASALAS, PRIEVR DV  
*Conuent de St. Mathieu, de l'Ordre des Freres Prescheurs  
de la Congregation de St. Louis en ladite Ville.*



A MONTPELIER;  
Par JEAN PECH, Imprimeur ordinaire du Roy & de ladite Ville  
M. D. C. XXXXIII



*ORAI SON FVNEBRE, SVR LA MORT  
de LOVIS LE IVSTE, prononcée deuant l'Assemblée  
des Estats Generaux de la Prouince de Languedoc, dans l'Eglise  
Cathedrale St. Pierre de Montpellier, par le R. P. CASALAS  
Prieur du Couuent de St. Mathieu, de l'Ordre des Freres Pres-  
cheurs de la Congregation de St. Louis en ladite Ville.*

Iustitia ante eum ambulabit, & ponet in via  
gressus suos. Psal. 84.

*La Iustice marchera deuant luy, & luy marquera toutes ses voyes.*

**P**ROVINCE desolée, LANGVEDOC affligé, As-  
semblée autant illustre par l'objet de tes larmes, que  
par la dignité de tes Ordres, de quel esprit receuras tu  
ce iourd'huy vne parole qui te va assommer? Tu gemis,  
le Ciel rit, il se rit de tes pleurs, & combat tes pleurs  
avec ses ioyes: tandis que la Iustice prepare à ton Monarque vn cer-  
cueil dans l'eau qui coule de tes yeux, l'amour l'enseuelit la haut dans  
vn tombeau de flammes, & par vn sort estrange qui dement le pro-  
uerbe, & trompe nos attentes, la Musique n'est plus importune par-  
mi les larmes, puis que l'harmonie des Anges s'accordera ce iour-  
d'huy avec les sanglots. Mais quoy! faut il ma langue, que ton pre-  
mier pas soit vne cheute? & peux tu sans luy faire iniustice, dire que  
la Iustice a ouuert vn tombeau à ce Prince qui deuoit ou renaistre  
souuent ou ne mourir iamais? La vertu est de son stoc immortelle,  
LOVIS estoit tout paistri de vertu, deuoit il donc estre mortel? non  
il ne le deuoit pas, mais pour punir nos crimes la Iustice a abregé ses  
iours: l'Empire des François n'estoit pas digne de posseder vn Roy  
digne de mille Empires. Il est vray que tandis que la Iustice loge son

côrps dans la terre, l'amour enseuelit son ame dans le Ciel, que S. Paul me represente comme vn beau cemetiere, & Dieu est le tombeau où tous les Saints reposent. *Mortui estis & vita uestra abscondita est cum Christo in Deo.* Placé entre ces deux estages, entre la Terre & les Cieux qui ont partagé les pretieuses despouilles de l'objet qui nous fait sousspirer, ie ne suis ny à l'vn ny à l'autre, ie suis à tous les deux; & partant tandis que le Diuin amour attendra mon Prince au bout de la carriere pour l'enfermer dans vn tombeau de feu, cependant la Iustice le prendra par la main & le conduira par les trois routes de sa vie mortelle qui respondent aux trois Ordres de cet auguste corps: du berceau sur le throsne, & du throsne à l'autel. Je veux dire de la vie priuée qui l'a fait Iuste, à la vie publique qui l'a establi Roy, pour finir dans la vie diuine où il fera l'office de Sacrificateur par vne immolation qui le rendra tout ensemble, le Prestre, la Victime, & l'Autel sur lequel la Iustice l'abandonnera au pouuoir de l'amour qui d'vne mesme main bastira son tombeau, & son triomphe. Allons donc ( M E S S E I G N E V R S ) allons, baisons, & reuerons les traces de celuy que la Iustice mene par vn chemin estoilé & bordé de lumieres. *Iustitia ante eum ambulabit, & ponet in via gressus suos.*

Si i'ouourois mon discours & la bouche de mon Prince avec les paroles du Roy prophete qui presse l'ouuerture des portes de la Iustice pour entrer dans les loüanges du Createur, quelqu'vn croiroit peut estre, que ie voudrois marquer par là, que c'est la Iustice diuine qui nous ouure les portes de la vie, dont les auenuës sont pavées de rasoirs, & herissées des espines du peché d'origine, par vne fatalité inescuitable qui rend esgalement les hommes aussitost coupables que viuans, & descend les Monarques dans les ceps, auant de les monter sur le throsne. Ma pensée est plus respectueuse; ie viens icy pour faire vn panegyrique & non vne satyre, aussi n'en ay ie eu iamais le dessein ni trouué le sujet. Je ne mesure pas la taille des hommes ( moins encor celle des Monarques ) par les desordres communs à toute la nature, mais par les ouurages de leur liberté, le malheur preside à celle-la, la Iustice menage celle-cy, elle mene les Roys par la main, & a monté les merites du nostre aussi haut que le throsne où le Ciel l'auoit fait asseoir, pour obliger à sa veneration ceux qui luy deuoiēt obeissance. Les Princes ont quelque chose d'eminent par dessus l'or-

dinaire des hommes, dans la majesté de leur visage, dans les Anges qui les conduisent, & dans les Astres qui leur versent, leur influence: quelques vus leur ont donné le nom de Heros, la verité les appelle Dieux dans l'Escriture, & les Gentils n'auroient point failli si equivoquans de la ressemblance à la verité de l'essance, ils n'eussent adiousté au titre de Dieux, l'adoration. Les peuples qui les croient d'une espee plus releuée que le commun des hommes, s'estonnent s'ils les trouuent esgaux, & s'escandalisent de les voir inferieurs; voila pourquoy les souverains ne se doiuent laisser iamais mesurer, car se mettre à l'espreuve sans estre asseurez de vaincre, leur est une assurance d'estre vaincus: on attend un ie ne scay quoy plus que des autres, de ceux qui ont un ie ne scay quoy plus que les autres qui fait marcher ces demi Dieux sur la teste des hommes. Cette diuinité dont l'esclat rayonnant sur le front des Monarques appelle les peuples à l'hommage, n'est autre parmy les Fideles, que l'innocence des mœurs qui fait la Iustice de la vie priuée des Roys, & des sujets qui composent le tiers estat. Alons donc, prenons la reigle en main, il nous le permettra, & mesurons la pieté de ce Prince dont les Enemis n'ont iamais peu mesurer la valeur, ni ses amis l'amour. Voyons s'il respond à la taille du Pere, qui n'a peu se le faire semblable, sans aussi tost le faire grand, ie dis grand autant en vertu qu'en courage. Je scay bien que la gloire & le blasme ne sont point des apanages de la naissance, mais pourtant l'une & l'autre se mesurent avec la naissance; le iet d'une fontaine porte aussi haut que le lieu d'où il part, le fils du forgeron se croit obligé à tout le moins de battre sur l'enclume comme son pere, celui du Magistrat à prononcer des Arrests, dessus les Fleurs de lys, & les enfans des Roys ne se satisfont point que sur les thrones, & parmi les Couronnes: mesurons donc la taille de LOUIS, par celle de HENRI quatre, que sa naissance Royale auoit fait grand parmi les hommes, que sa pieté rendit apres plus grand parmi les Fideles, & que dans toute apparence ses merites ont fait tres grand parmi les Saints. Ses grandeurs assemblées ont esté recueillies par son fils qui les a heritées avec ses Couronnes, & a fait voir dans les pratiques irreprochables de la vie priuée, & par la iuste expression des grandeurs de son Pere, que la Iustice le menoit par la main. *Est in Filys Patrum virtus, nec imbellem generant aquila columbam.*

Tous les hommes desirēt la grandeur, plusieurs la cherchent, peu la trouuent, pource qu'il y en a peu qui ayent le veritable bien pour obiet, & la iustice pour guide. Comme le vray bien n'est icy reconneu que des yeux despoüillez de passion, qui sont aussi rares que les miracles, de là vient que selon l'inegalité de leurs veües, & la diuerse pente de leurs inclinations, les hommes ont estably diuersité de bonheur, & ont prins des routes opposées pour le ioindre. Le Libertin le cherche au dessoubz de l'homme, le Politique dans l'homme, & le Chrestien monte au dessus de l'homme pour le trouuer; le premier y va par les fougues d'une passion auecugle; le second par les sentiers de la raison, mais debauchée, & le dernier par les voyes de la vertu chrestienne que l'Euangile nomme Iustice. Suiuez moy's'il vous plait dans cette discussion. Les hommes sensuels qui n'ont autre conduite que celle de la chair & des sens, dont les plus eminens obiets sont tousiours inferieurs à l'homme, au lieu de monter ils descendent, & vont comme des estourdis chercher leur felicité où l'on a accoustumé de la perdre, c'est dans les honneurs, dans les plaisirs brutaux, dans les richesses, & semblables amorces qui ne sont inuentées que pour flatter l'opinion, & dont les moins viles sont d'ordinaire les plus pretieuses: ce sont de filets tendus dessoubz les fleurs pour prendre les esprits; de venins enchanteurs detrempez dans les delices; des hameçons dorez qu'on ne peut prendre sans estre pris: d'ou vient que comme nous voyons souuent dans nos Temples, des Couronnes qui pendent à des chaisnes, nous trouuons aussi dans cet estage honteux & inferieur à l'homme, des hommes couronnez qui baissent les liens soubz lesquels ils souspirent, des Monarques attachez à la chaisne & esclaués de la passion; Neron de la cholere, Alexandre de l'ambicion, & Salomon de l'infamie. Or sur le front de ces captifs volontaires est planté vn beau lys; sur ces testes couronnées est placé le throsne de LOUIS LE IUSTE, qui exempt des passions qui ont mis tant de Souuerains à la cadene, pour le soulagement de sa vie priuée, n'a eu d'autre exercice que celui de la chasse & de la musique, que les plus seueres senseurs ont tousiours reconneu pour des pratiques innocentes, & que les doctes scauent estre les diuertissemens des Heros de la terre, & des Anges du Ciel. De fait la chasse est vne espeece de guerre, & elle est d'autant plus raisonnable que les autres, puis qu'il nous est plus naturel d'auoir de



l'empire sur les bestes que sur les hommes : Celle des animaux est vn apprentissage aux Princes infidelles contre leurs ennemis, & aux Roys Chrestiens contre les vices; c'est pourquoy comme nous scauons que dans la pourluite des bestes sauuages, le fondateur de l'ancienne Rome, estudia l'art de vaincre les hommes, ainsi l'exercice exterieur de nostre Prince fut le prelude & la monstre de l'interieur, & la chasse des bestes, l'essai & l'image de la guerre qu'il faisoit aux passions, dont celle de la chasse ne peut estre qu'innocente & seante à vn Roy, puis que l'antiquité autant sage que misterieuse, nous a fait voir ses diuinitez descendues en terre pour chasser dans les bois, & le vray Dieu pour prendre les humains, a prins luy mesme la posture d'un chasseur. D'ailleurs St. Iean nous dict que la musique est l'exercice ordinaire des Anges dans le Ciel, icy l'accord des voix fait celuy des passions, & l'harmonie qui chasse les demons du corps de Saül, ne l'introduit pas dans le cœur des grands qui ayment la musique. Ces deux sortes d'esbats qui fauorilent l'innocence, ont esleué nostre Monarque sur la teste de ces infortunez qui ont rauale leur throsne au dessus de la condition des hommes, & marchans sur leur front par l'esclat de leur pourpre, ont roulé sous leurs pieds par la tyrannie de leurs passions, sans que cette violence les excuse, pour ce qu'estant volontaire, elle ne peut estre que criminelle. *Eò rea quò libera, eòque ancilla quò rea, ac per hoc eò ancilla quò libera.* Dict St. Bernard. Croyez moy, tous les Monarques portent Couronne, mais tous ne la scauent pas porter, pource qu'il y en a peu qui scauent resister au pouuoir qu'elle leur donne : Leur puissance, quoy que souueraine, fait souuent pallir leur pourpre, & leur sert de reproche plustost que d'ornement. Le diademe pare Louis & ne l'aueugle pas; c'est pourquoy ie ne m'estonne pas si sa vertu a haussé son throsne au dessus des passions, puis qu'elle l'a porté dans vn estage plus haut, & au dela de la politique, qui pour n'estre pas bien mesnagée est fatale au souuerain qui cherche son bonheur dans l'homme, qui preferé l'interest à la cōscience, & cesse d'estre religieux pour deuenir grand homme, d'Estatt: Louis n'est pas descendu au dessus de l'homme, voyons s'il ne s'est pas arresté dans l'homme.

Former des maximes de Politique, & en escrire des regles tirées de la prudence humaine, c'est vouloir que la creature commande au Createur, & si ie l'ose dire, c'est oster la diuinité à l'Eternel, & la

transferer aux causes secondes dont Dieu se sert mais il ne leur sert pas. Celuy qui pour donner raison d'un euenement naturel, n'alleguerait que la seule volonté du Createur, seroit mauuais philosophe, & celui qui ne la reconnoistroit pas comme cause des euenemens politiques, ne seroit pas Chrestien. Voulez vous apprendre le meilleur art de regir les Prouinces, & conseruer les Estats, lisez le Decalogue, ou dans dix reigles que le St. Esprit a dictées, vous trouuez les documens les plus assurez pour le Ciel & les moins trompeurs pour la terre. La politique est vne mer si perfide & si remplie d'escueils, qu'on n'y scauroit marquer vn seul endroit où on n'ait veu faire naufrage à quelqu'un de ces Princes, qui sont plus scauans dans les manieres de Machiauel, que dans celles de l'Euangille où le nostre auoit apprins l'art de regner, & de bien regner. Dans les routes de la passion, il a fui l'exemple de Salomon pour suiure celui de St. Louis, tous deux Monarques : Dans les voyes de la politique, il reiette la prudence de Saül reprouué, pour imiter celle de Dauid choisi selon le cœur de Dieu, tous deux Princes : voyez & admirez comme il menage sa conduite en vn pas si glissant : Saül menacé par Samuel de la perte de ses Estats pour chastiment de sa desobeissance, coniure ce Prophete de retourner avec luy au sacrifice, & prend la posture d'un Roy penitent pour esuier la peine d'un rebelle : il n'a pas conneu la volonté du Seigneur, qu'il cherche les moyens de l'empêcher : & à peine cesse-il d'estre religieux, qu'il commence à deuenir politique ; comme si la raison d'Etat qui ne suffit pas pour nous deffendre contre les hommes, suffisoit pour nous proteger contre Dieu. Sauter de la Religion à l'hipocrisie, se couvrir du manteau d'un Dieu pour faire respecter le crime d'un homme, offenser l'Eternel & se parer de ses liurées, ce n'est pas seruir Dieu, mais se faire seruir à Dieu & d'autant qu'on ne peut pas le tromper, Saül se trompe luy mesme, & sa fausse politique luy fait perdre la vie avec ses Estats. Dauid au contraire pouuant oster la vie avec la Couronne à Saül lors qu'il le tenoit dans la cauerne, ne le fait pas & s'abstient de sa mort, non par raison d'Etat, mais par vn effet de la crainte de Dieu, & pour le respect qu'il porte à l'oinct du Seigneur : il fait seruir l'interest à la conscience. *Non mittam manum meam in eum quia Christus Domini est.* Politique nouuelle, maxime qui n'est pas connue de tous les Princes infidelles, ni pratiquée par tous les Chrestiens, mais



mais il faudroit estre auueugle pour ne la descouurir pas dans la conduite du nostre qui a tousiours réglé l'intérêt par la conscience, la politique par la religion, & ne s'est iamais serui de l'espée que la Iustice porte en la main droite, que lors que la balance qu'elle tient en la gauche luy a esté inuile. Qu'un exemple serue pour tous : ie ne veux pas produire celui que ie vois retracé avec de caracteres de lumiere sur le sablon du Loire, où la présence de nostre inuincible Coriolan vainquit & espargna les vaincus pour en faire vn present à sa Mere. Ie veux que contre la maxime du philosophe, il agisse où il n'est pas, & que son ombre fasse de miracles. Cet exemple a eu Casal pour objet, l'Italie pour theatre, & tout l'vniuers pour tefmoin, ou pour admirateur. Casal est assiégué; mais il est deffendu par vn Mars originaire de cette Prouince, qui fit perdre la vie & la reputation à vn conquerant iusques la inuincible, & qui vaincu de honte & de regret de se voir arrester aux pieds d'une Citadelle par vn braue du Languedoc, cessa de viure aussi tost que de vaincre : cette Espine, fatale à nos aliez, & qui leur auoit tiré tant de sang, ne les piquera plus. La place cependant est pressée des Espagnols, & secouruë par les François, qui estoient desia en presence, le signal du combat donné, & la victoire mesme leur offroit sa main pour applanir les retranchemens des aduersaires, qui pensoient plus à fuir qu'à combattre; lors que le Vicaire & Souuerain Interprete des volonteiz de Iesus-Christ, ayant fait connoistre à nostre Armée desia deux fois victorieuse, par la bouche d'un sien zelé & fidelle Ministre, que le Ciel vouloit que la France fit quelque pose entre ses victoires, & qu'elle espargnat le sang ennemi qu'elle auoit droit d'espandre; soudain l'esprit de Louis agissant dans celui de ses Generaux, qui n'ont agi ni relasché que par ses ordres, par vn ordre expres arreste le courage des Chefs, lie les mains à nos Soldats, & quoy que le bonheur du succez fut en ses mains, & que la deffaitte sanglante de l'Armée ennemie deuit estre la ruine du parti, il prefera la douceur d'un Chrestien aux triumphes d'un vainqueur, & fit ceder les interets de sa reputation aux loix du christianisme, qui exhortent le vainqueur à la clemence : si bien que renuoyant leurs Lyons & leurs Aigles qui se venoient rendre à nostre Camp pour trainer le Char de la victoire, & servir au triomphe de Louis, il se contente de donner la liberté à Casal, & avec luy à toute l'Italie sans espandre du sang; Politique ad-

mirable, tirée sur celle de Dauid & ordinaire à nostre Prince. Le monde voit des Souuerains qui comme Saül font marcher Dieu deuant eux, mais ne le suivent pas; La Religion leur est vn pretexte & non vne raison; LOUIS n'a d'autre Estoile polaire que la Religion, & il estoit au milieu de ses estats comme vn Patron dans sa barque qui ne remuë le gouuernail qu'apres qu'il a consulté la bouffole, & regardé le Nort; car il a pris dans le Ciel les regles de sa conduite, & la condite de ses peuples. *Scio hominem in Christo non mentior.* Je ne mens point, ie connois vn hōme consacré au seruice de Iesus-Christ, qui a remarqué en nostre Monarque vne pratique, qui sans doute luy estoit ordinaire, c'est qu'apres son leuer, faisant ses prieres à genoux dans vne sale où il y auoit plus de cent personnes qui bordonnoient ensemble, & faisoient vn bruit estourdissant, il estoit luy seul dans le silence, aussi paisible, recuilli & attentif à Dieu que s'il eust esté seul au milieu d'un desert: Il estoit la comme vn autre Moysse sur la croupe de la montagne, où nonobstant les esclairs du tonnerre & le bruit importun des courtisans, il traitoit confidamment avec son Dieu, consultoit ses volontez, receuoit de sa main les tables de la loy pour les donner à ses peuples, & cette loy estoit l'ame de sa politique. Que si apres cela, la calomnie qui voudroit rendre l'innocence hontueuse ne pouuant la faire criminelle, ou si la pieté trop scrupuleuse de ceux qui condamnent ce qu'ils n'entendent pas, entreprennent de mordre ou de pincer cette main royale qui a receu les assistances de l'Eglise, & le secours des Protestans, pour maintenir ses Estats, & acheuer ses triomphes avec deux aydes si contraires, ie luy ferme la bouche par l'exemple d'un Roy St. dont le Ciel a canonisé le merite, & raporté l'action au premier des Roys: c'est Dauid qui se fait bailler au Prestre l'espée du Geāt Goliath hōme incirconcis & infidelle, pour ce qu'il n'en auoit point d'autre pour se deffendre, & mange du pain sacré de proposition n'en ayant point d'autre pour se sustenter. Ce n'est donc pas traïner au dessous de l'homme avec Salomon, que de mener vne vie innocente sous la pourpre: Ce n'est pas rouler dans l'homme avec Saül, que de prendre dans le Ciel l'art de gouuerner les Empires: c'est s'esleuer au dessus de l'hōme avec Dauid & St. LOUIS deux Saincts Monarques, que le nostre a prins pour regles de son gouuernement, & pour modelles de sa pieté qui est la Iustice chrestienne laquelle l'a conduit dans cette

eleuation. *Leuauit se supra se.* Pour ce que, *Iustitia ante eum ambulabit & ponet in via gressus suos.*

C'est pourquoy i'estime qu'il en est des Princes & des grands, cōme des corps que la philosophie a distribué en trois estages, qu'elle nomme les corps mixtes, elementaires, & celestes; entre lesquels ie remarque cette notable difference, que la corruption se mesle avec les mixtes, se forme dans les elemens, & n'entre point dedans les Cieux, à tout le moins dans l'Empirée, qui pour estre le séjour de la saincteté, ne peut souffrir la corruption. Je dis qu'il en va de mesme des Souuerains car le monde voit des Monarques vicieux, avec les Boleslas, les Heliogabales, & les Salomons, qui sont la proye du vice & de la corruption: d'autres qui avec les pompées, les Cæsars, & les Saüls, s'ils eurent les attraits de la corruption en leur personne, ils la forment neantmoins dans leur Conseil, & la versent a pleines mains sur la teste des peuples par leur fausse politique; mais mon Dieu vous aues placé LOUIS LE IUSTE au dessus des Princes, de la corruption & du vice, qu'il n'a peu souffrir ni en sa vie ni en sa Cour, que pour cela nous auons souuent admirée comme vn beau Ciel, comme vn sacré Empirée, où ni la verité ni l'image du vice ne sont point reconnues. *Non dabis Sanctum tuum, Iustum tuum videre corruptionem.* Surquoy ie fais cette remarque, que si l'Escripture parlant des Roys les appelle des Dieux, *ego dixi Dij estis.* C'est pour nous faire comprendre, que comme Dieu est le Roy du Ciel, Les Roys sont les Dieux de la terre, & ainsi ie considere le IUSTE, mon Prince, parmi ses Courtisans, comme vn Dieu au milieu de ses Saincts: car comme la Theologie enseigne que Dieu ne regarde, & ne connoit les Saincts que par soy mesme. en tant qu'il est leur exemplaire, & qu'ils sont des participations de sa saincteté: d'où vient que sa veüe ne scauroit porter droit dans le vice. pour ce que le vice n'a point d'idée ni d'exemplaire en Dieu, *Mundi sunt oculi tui ne videas malum & non poteris respicere ad iniquitatem:* Ainsi ce petit Dieu de la terre, LOUIS LE IUSTE, ne voyoit & ne souffroit en sa Cour ni à sa suite, moins en sa presence, que ceux dont il estoit l'exemplaire, & qui estoient les copies viuantes de sa pieté; ses yeux ne pouuoient souffrir aucun courtisan vicieux *Non dabis Iustum tuum videre corruptionem.* Le Louure sembloit plustot vn Cloistre qu'une Cour, & sa Cour estoit si fauorable à la vertu qu'elle seule y estoit adorée, mais ado-

rée avec vn tel succez, que les affections de son cœur Royal estoient aussi sacrées que sa personne, l'inclination qu'il tesmoignoit auoir pour quelque grand, estoit vn argument de son merite. C'estoit vn Soleil qui dispensoit inégalement la clarté aux Estoiles, & son affection toujours iuste en estoit la mesure; Mais ô Dieu! ce Soleil est esteint, quel moyen donc d'accorder l'Escriveure avec ce que ie vois? elle dict que le Roy est vn Soleil brillant de Majesté au milieu de ses Estats, & ainsi Louis est vn beau Soleil couronné de rayons, le rapport en effet est iuste; mais accordez cecy, la moindre des Estoiles, dict la Philosophie, est plus grâde que toute la terre, & cependant six pieds de terre enferment mon Soleil; toutes fois ie me troye car la terre ne possède que le corps, l'Esprit qui fait sa plus noble portion est enseveli en Dieu, & l'estoit mesmes viuant dessus la terre pour enleuer ses sujets de la terre, & les vñir à Dieu, pour ce que c'est le deuoir d'un Prince d'vñir & de sousmettre à Dieu, les peuples qu'il a soumis à son autorité: c'à esté la pratique ordinaire de Louis, & le soin principal de sa vie Royale, où les nobles & les grands trouueront le patron de leur vie, & le caractère de la veritable valeur.

Car i'ay autres fois medité chez platon cette belle doctrine, que ce qui tient le premier rang en chaque ordre des choses, est la boucle & la mesure des autres qui lui sont inferieures. Il en est la mesure pour ce que dans cet ordre, tout le reste n'est plus ou moins parfait qu'autant qu'il s'approche ou s'esloigne de lui. La boucle qui lie les inferieures avec les superieures, d'autant que le voisinage qu'il a avec ces deux extremes, le met en estat de les approcher & de les ioindre. Louis est le premier de ses peuples, puis qu'il en est le Roy, il en est donc la boucle & la mesure: la mesure, pour ce que par la difference des affections que son cœur tesmoignoit à quelques vns de ses sujets, on iugeoit aussi de l'inegalité de leur merite: il en estoit aussi le nœud, veu que considerant qu'il n'auoit des peuples soumis à sa puissance, que pour les assujettir à l'Eternel par son exemple, il s'y sousmettoit lui mesme, non seulement par les dependences secretes de son cœur, mais aussi par vne declaration authentique & publique, par laquelle il mit sa personne, ses Estats, ses Couronnes, & ses sujets en la main de la Mere de Dieu, pour les offrir & sousmettre à son Fils. Il en est de la Royauté comme du franc arbitre, aussi est ce par luy que l'homme est Roy. or la liberté est composée de



deux pièces, dependance, & independance; dependance du cœur humain au tout puissant; c'est cette piece qui le sousmet à Dieu, car les autres creatures ne s'assujettissent pas à luy, mais sont assujeties par luy mesme, & de cette dependance & sousmission que l'homme rend à Dieu, resulte en luy vne independance generale de tout ce qui n'est pas Dieu: ces deux pieces aiustées ensemble forment la condition souveraine des Monarques, car ils ne voyent les peuples sousmis à leur autorité, que pour ce qu'ils sont eux mesmes sousmis à l'Empire du Createur, & de cette dependance vient l'independance generale, voire l'autorité supreme qu'ils ont sur leurs sujets: & pour cela nostre Prince fait cette declaration publique pour dire à tous les siecles qu'il ne veut auoir droit de commander aux autres, que par les soins qu'il a d'obeir luy mesme à son Dieu: en quoy il a pratiqué vne haute Iustice, car n'estoit il pas iuste qu'il se sousmit à celuy qui luy auoit sousmis tant de nations? *Iustitia ante eum ambulabit.* La desobeissance de Saül donne le dernier branle à la rouë de ses grandeurs; elle est vn feu qui brusle, & qui consume les Couronnes, pource qu'elles sont paistries dans l'obeissance, & que dans cette obeissance, comme le Prince s'abandonne à la conduite de Dieu, Dieu prend la conduite du Prince, paroist visiblement à sa deffence, & fait des miracles par sa main, à la gloire de ses Estats, & à la honte des ennemis qui le combattent. FRANCE tu es aueugle si tu n'as remarqué: Espagne tu es insensible si tu n'as senti, comme tu l'as expérimenté à ton dommage, que cette main miraculeuse qui escriuoit sur le front d'une muraille, le desastre du Roy Baltazar, & la ruine de ses Estats, c'est la main de LOUIS qui fait trembler l'Europe, pour ce que le bras de Dieu la remüe. C'est vne main miraculeuse qui fait fremir l'Alemagne, & donne le temps, & le sujet à l'Espagne de soupirer.

Dieu le plus souuent dans les accidens du monde ne laisse voir sa main qu'àux yeux les plus penetrans, pour ce qu'il se sert du train ordinaire des causes naturelles où la creature paroist autant, & plus que le Createur: quelque fois elle est apperceüe des plus aueugles, veu qu'il se sert du bras surnaturel de sa toute puissance. Lors qu'on void des euenemens directement opposez aux ordinaires, comme que les vigilans s'endorment, les prudens se confondent eux mesmes, les valeureux deuiennent poltrons, les conquerans se rendent tributaires:

c'est là que ceux qui ont bonne veüe reconnoissent le doigt du tout puissant, qui lors qu'il veut humilier vne maison ou vn Estat, permet que les sentineles s'endorment, & que sa propre prudence soit sa ruine. Quelque fois leuant le masque & abandonnant le train des causes naturelles, il enuoye extraordinairement vn Ange pour incendrer les Villes, il suscite les Capitaines qui de leur seule reputation mettent en fuite les Armées enemies, & renuersent les murailles de Ierico par le seul bruit de leurs trompetes : parmi lesquels euenemens il n'est point homme, pour aueugle qu'il soit, qui n'y remarque la main toute puissante du Createur. Et qu'auons nous veu en nos iours? n'auons nous pas veu les fins surprins dans leurs finesses, les prudens assoupis, les preneurs prins, leurs Princes & leurs Generaux deuenus habitans de nos Citadelles? Et toy braue Languedoc, n'as tu pas veu comme à tes portes, le Lyon de France a batu & chassé celuy d'Espagne, qui te vouloit deuorer? qui s'estoit promis de dejeuner à Leucate, d'ylner à Narbonne, souper à Beziers, & coucher à Montpellier, mais ce Lyon deuorant fut la proye du nostre; & qui a operé cette merueille? n'est ce pas la main de Dieu qui combatit visiblement pour ton Prince? *Quia manus Domini erat cum illo.* FRANCE ma bonne Mere: ie ne dis pas cecy pour affoiblir ton merite, ou pour obscurcir la gloire de tes enfans, qui ont repris en Lyons ce que l'enemi auoit prins en Renard, & qui ont peint la frayeur avec leur espée sur le front de l'Alemagne, de l'Italie, de l'Angleterre, & del'Espagne: c'est seulement pour faire voir que la main de Dieu s'est iointe avec la leur pour ouurir vn passage à nostre Roy, & à toutes ses conquestes. Voulez vous connoistre sensiblement quand est ce que la main de Dieu est avec vn Monarque, ne considerez pas tant les ouurages de sa prudence, ni les effets de sa valeur, que les assistences qu'il reçoit des choses naturelles & inanimées, comme sont les Elemens, pour ce que ce sont eux, comme dict l'Eseriteure, qui executent la parole de Dieu, & qui ne bougent point si sa main ne les remue: c'est pourquoy ie ne me veux pas arrester à la prise de Suse, Hefdin, Arras, ou Perpignan, qui sont les ouurages de la conduite, & de la valeur de nostre Roy: ie veux voir dans sa main celle du Createur, qui fait que tous les Elemens prennent des postures animées en faueur de LOUIS, pour contribuer à ses victoires. L'Ocean, le plus impetueux de tous, a reconnu dans la



main de nostre IUSTE, celle de Dieu, & sa parole escrite sur le front d'une Digue, qui l'a respectée autant qu'elle nous a esté nécessaire pour fermer le passage aux Anglois, & nous l'ouvir dans la Rochelle: si bien que dans l'attente de ce double succez, qui a basti nostre triomphe sur son obeissance, il a suspendu les efforts de ses vagues, & pour parler aux termes de St. Basile de Seleucie, il a humblement courbé ses flots pour faire hommage à cette main Royale qui luy auoit planté de nouvelles limites. *Curuatis fluctibus termini positorem adorat.* Les vents & les orages, deux années de suite, se sont liguez sur les Mers d'Italie pour dissiper, comme ils ont fait, les Flottes ennemies qui venoient s'emparer de nos Isles de Pronence: La terre se met de la partie; car vn escriuain de nos iours a remarqué qu'elle trembla auant l'heureuse naissance de nostre Monarque, & par cette conuulsion lui fit hommage. Nous sçauons aussi qu'un boulet de canon tiré de la Rochelle contre mon Roy qui se promenoit proche de la Digue avec quantité de Seigneurs, tomba à trente pas de luy, & au lieu d'aler contre luy, comme son cours portoit, cette boule enflammée gauchit & bondit à costé, respectant l'oint du Seigneur, pour ce que la main du Seigneur la conduisoit. Et du despuis le feu du Ciel esclancé de la nuë grosse de foudres, & coupée d'esclairs, l'ayant surprins en plaine campagne proche de St. Germain, du bruit de ses esclats, & de l'esclat de ses tonnerres, abatit les cheuaux qui trainoient mon Monarque: estonna sa noblesse, & dissipa ses Gardes, mais apres que ce carreau allumé eust fait le tour du Cartosse Royal, il respecta, & n'osa approcher celuy qu'il vid dedans couronné de Lauriers; & ainsi tous les Elemens ont fait hommage à celuy que la main de Dieu & sa Iustice conduisoit victorieux & triomphant à la ruine de la rebellion, au secours de ses Alliez, & à la déroute de tous les ennemis qui ont osé mugueter son Empire. *Iustitia ante eum ambulabit.* Voyez en le succez.

L'Herésie ayant parù le glaïue en main, pour s'establir par la force contre son legitime & naturel Seigneur, perdit le peu de creance qu'elle auoit butiné parmi les peuples, qui ne peurent comprendre que l'Euangile se deuit planter avec les Armes, & que les sujets d'un Prince peussent estre tout ensemble, rebelles & religieux: & c'est icy que nous deuons admirer la prouidëce de Dieu sur ce Royaume: Les Rebelles font des puissans efforts pour secoier le ioug, & denier

l'obeissance qu'ils doiuent à leur Prince naturel, & Dieu les ramene dans l'obeissance, par les mesmes voyes qu'ils auoient prins pour la fuyr, c'est à dire avec les Armes. Les vens font les vagues, & les defont lors que le soufflé de Dieu les pousse; Les armes qui auoient conceu la rebellion des Heretiques, enfantent leur obeissance, & la prise de la Rochelle ( centre, source, & allumette de sedition ) a fait la reduction des autres villes rebelles, lors que le bras de Dieu a remué la main de Louis qui est entré vainqueur & triomphant dedans cette superbe, qui s'estoit si souuent parée de nos depouilles, qui auoit fait tant d'affrons à nos Roys, & qui s'est trouuée surprise de voir qu'apres tant de reuoltes, & lors que pressée d'une faim enragée qui la traîna la corde au col aux pieds de son Vainqueur, elle qui estoit criminelle, qu'elle deuoit aprehender de commettre vn nouveau crime, seulement de pretendre au pardon: Neantmoins au lieu de tous les foudres qu'elle auoit merité, Louis ne luy en fit voir que les esclairs. Rochelle tu vis venir à toy ton Monarque comme vn Dieu de batailles les tonnerres en main, mais tu l'esprouuas vn Dieu de paix lors qu'il t'eust forcée de luy ouurir les portes. Sa bonté desarmée se contenta de ton cœur, & espargna ton sang. Tout estoit en armes au tour de lui, lui seul estoit sans armes, & sans iauelot comme le Roy des Abeilles qui n'a d'autre esguillon, que du miel dans la bouche, dict Seneque. *Rex ipse sine aculeo est.* Rochelle tu as veu ton vainqueur, vaincu deuant tes portes, vainqueur par l'effroy de son bias, vaincu par les tendresses de sa bonté: si bien que par vn soit estrange ta prise a esté tout ensemble l'esueil de ton arrogance, & le berceau de ton salut; le tombeau de ton libertinage, & l'Autel de ta liberté. Quand la Iustice de ton Roy est courue, non aux chastimens mais au baiser de paix. *Iustitia & pax osculata sunt.* Je ne m'en dedis point, ce pardon general a esté vne haute Iustice de nostre Monarque, car il n'a point fait demarche en sa vie que la Iustice ne l'ait guidé & conduit par la main. *Iustitia ante eum ambulabit:* Qu'apelez vous Iustice? c'est rendre à vn chacun ce qui luy est deu, qu'est ce que le Prince doit à ses sujets rebelles? qu'est ce qu'il doit à sa bonté Royale, & à son caractere? aux rebelles chastimens: à sa dignité, pardon, clemence; car comme dict Seneque, la clemence est le caractere des Roys, & la difference qui distingue les Couronnes des autres fortunes; Et ainsi, si le Roy eust perdu

perdu les rebelles de ses Estats, il leur eust fait Iustice, ils l'auoient merité, mais en leur pardonnant il se fit Iustice à soy mesme, accordant à sa bonté & condition Royale ce qu'elle demandoit, c'est à dire la clemence. C'est pourquoy quand ie le considere entrant dans la Rochelle vainqueur & clement tout ensemble, ie luy dis rai de ses bontez, ce que St. Ambroise disoit du Dieu dont il est le Lieutenant en terre *Iustus es Domine, cum peccatoribus parcis*, Il faisoit difference de ses enfans, quoy que mutins, d'auec les estrangers, car d'une main tousiours triomphante il a mis en chemise les ennemis qui ont osé esbrecher son manteau : il leur a fait Iustice, leur rendant ce qu'ils auoient merité par leur ambition; mais il veut se faire Iustice à soy mesme lors qu'il pardonne à ses sujets rebelles & vaincus; Et certes ie ne m'estonne pas si nostre Dauid qui fut vn Lyon contre Goliath est vn Aigneau enuers Saül, puis qu'il estoit l'image viuante de ce Dieu qui fut vn Aigneau enuers les pecheurs, & vn Lyon contre les demons. L'amour gaigne les domestiques, la crainte modere l'estranger, qui respecte ceux que LOUIS deffend, & tremble lors qu'il paroist en armes. La force luy a fait rendre ce qu'il auoit pris à nos aliez, & la peine d'auoir eu du dessein sur les Estats de LOUIS, est de lui abandonner les siens, qu'il ne scauroit deffendre lors que mon Prince s'en veut saisir. Il ne fait que iouer au mail pour luy raiuer son Perpignan, que plusieurs de nos Roys auoient trouué imprenable, & que LOUIS prend en iouant. On ne scauroit conter ses victoires, il les faut admirer. Ses exploits nous font voir que la fortune & la victoire sont esclaués de la Iustice & du IUSTE, qui a fait demeurer debout nostre repos & sa fortune, & a vëu monter sa fortune plus haut que ses desirs. Interrogez l'Espagne, elle en peut scauoir de nouuelles.

Il en est des Princes comme des Elemens, plus ils sont voisins moins ils s'accordent. Il y a long temps que nos voisins font l'amour à la France, mais la France qui est trop peu pour leur ambition, est trop pour leurs forces; elle n'attend d'eux rien de bon car ils sont auides, mais aussi elle n'en craint rien, car ils sont foibles. LOUIS a donné à l'Espagne ce qu'il n'a iamais eu, c'est la peur, dont elle ne peut esuiter les iustes frayeurs, mesmes apres la mort de nostre Prince, qu'en demandant la paix à son fils heritier de sa valeur & de sa fortune : autrement l'ennemi à sujet d'aprehender que ce qu'il a

desia veu ne luy arriue de rechef, c'est que ceux qu'il a enuoyez contre nous, se sont ioints à nous, & d'ennemis sont deuenus nos freres, sujets comme nous d'un mesme Roy. Barcelonne reconnoit la France, le Portugal lui est allié, ce sont deux conquestes de la reputation de mon Prince. Les Catelans veulent appartenir au plus glorieux des Monarques, ils ne peuuent donc choisir que LOUIS, & sa protectiō est necessaire aux Portugais pour maintenir leur empire & leur liberte qu'ils ont reconquise avec tant de valeur Voyez & comprenez cecy, car il y a du mystere. Saül enuoye de gens de guerre apres Dauid pour s'en faistr; ceux cy l'ayans trouué en ramatha au milieu des Prophetes, au lieu de l'arrester arresterent avec lui, saisis de l'esprit de Dieu qui faisoit prophetiser Dauid avec les autres. Mais comme ils ne reuenoient pas, Saül y en enuoya d'autres pour le mesme dessein, mais ils firent comme les premiers; ce qui l'obligea d'y commander vne troisieme bande de Soldats qui firent comme les autres, & se iointrent à Dauid; ravis de l'esprit de Dieu, qui parloit par sa bouche, & qui les fit prophetes. Saül escumant de fureur & de rage y va luy mesme pour saisir son ennemi au collet, mais il fit comme ses soldats; car il se despoille en chemin de ses vestemens, & commença de prophetiser comme les autres au lieu d'arrester Dauid, d'où vint le proverbe *Num-et Saül inter Prophetas?* Voyla pas vn Image fidelle de ce qui s'est passé en nos iours, & sous le regne de nostre Prince? L'ennemi a deslaché contre cet Estat toutes les nations qui combattoient sous ses drapeaux, pour s'en saisir à main armée; par ses ordres, les Catelans ont voulu entamer nos frontieres, mais ceux que Saül enuoyoit pour prendre Dauid, sont demeurés avec lui, ravis des oracles de ce Prophete; car nous scauons que nostre Monarque a esté comme Prophete, puis qu'auant sa mort il auoit predict le succez de la iournée de Rocroy; & ainsi les Catelans nos aggresseurs sont deuenus nos freres, estonnez des oracles, & ravis des miracles que l'esprit de Dieu faisoit par la main, & la bouche de ce Roy Prophete. *Factus est etiam spiritus Domini in illis, & Prophetare ceperunt etiam ipsi.* L'esprit de Dieu qui a retenu les Catelans avec nous, a predict par leur bouche qu'ils ne seroient pas seuls. L'euement a répondu à leur prophetie, car le Prince de Morgues qui nous faisoit la guerre par terre & par mer sous les armes d'Espagne, est deuenu François d'alliance & d'affection. Enfin il a enuoyé con-

tre nous les Portugais, autre fois ses sujets, mais ils ont suivi l'exemple de Monaco & de la Catalogne, & se sont estimez heureux d'entrer dans l'alliance, & sous la protection du Roy des Lys. Que fera donc Saül, puis que tout le monde l'abandonne? si mon conseil estoit suivi Saül viendrait luy mesme, non pas pour saisir Dauid, mais pour l'admirer, & demander l'amitié & la paix au fils de celuy que l'esprit de Dieu a fait Prophete, sa main a fait vainqueur, & que sa Justice a mené par la main en toutes ces conquestes; n'est il pas iuste de ceder à celuy que Dieu conduit & protege? *Iustitia ante eum ambulabit & ponet in via gressus suos.* Mais disons mieux; mon Prince, invincible Monarque n'est il pas iuste que vous combatiez pour vostre protecteur? la Justice Divine qui vous a iusques icy couronné de Lauriers, exige-telle pas de vostre main triomphante que vous releuiez les Autels du vray Dieu, qui a luy mesme de sa main affermi vostre throsne, & acheué vos triomphes? vous aues esté tousiours Iuste, soyez le maintenant & plus que iamais. *Iustus es Domine & Rectum iudicium tuum.* Iusques icy nous vous auons consideré comme vn homme Iuste, où le tiers Estat a trouué vn patron de sa pieté, comme vn Roy vainqueur miroir de la Noblesse, maintenant nous vous alons admirer comme Prestre, & Sacrificateur qui reestablit l'Autel des sacrifices, & presente au Clergé vn patron, vn modele, vn prodige du zele qui le doit animer.

C'est vne agreable enchefneure, celle que le Philosophe a remarqué entre les estres de l'vniuers où le premier d'vn ordre inferieur est le dernier de l'ordre superieur, & participe à ses auantages; La plus noble des plantes a quelque chose de l'animal; car il y en a qui se retirent lors qu'on les touche comme si elles auoient du sentiment; le plus parfait des animaux qu'on croit estre l'Elephant a quelque trace de la raison humaine, & vn' ombre de religion qui le courbe deuant la Lune; nous voyons aussi des hommes dont l'esprit subtil & penetrant tient quelque chose de l'Ange. *Supremum infimi est infimum supremi.* Par cette regle comme nous remarquons trois ordres subalternes qui composent les <sup>range</sup> ~~estres~~ de cet auguste corps; le Tiers-Estat, la Noblesse, & le Clergé, celuy qui est le premier & le plus esleué du tiers-estat, doit participer à l'ordre superieur, & tenir de la Noblesse, acquerant par la generosité de son cœur, & le merite de ses actions ce que la naissance luy auoit refusé; & par la mesme rai-



son le premier des Nobles, qui est le Roy, entre dans les avantages de l'ordre superieur, & tient du Sacerdoce. *Supremum infimi est infimum supremi.* C'est pour quoy soit que vous consultiez les liures sacrez ou prophanes, vous trouueres que le Sacerdoce a esté tousiours inseparable de la Royauté. Adam a esté Roy & Prestre, & comme il a regi des hommes, il a offert aussi de sacrifices; despuis Adam iusques à Abraham les premiers nais ont esté Roys & Prestres, Abraham mesme & ses enfans iusques à Ruben qui fut priué du sacerdoce pour auoir souillé la couche de son pere. Parmi les Gentils celuy qui estoit Roy estoit obligé de se faire prestre, ainsi qu'Estrabon l'asseur des Ethiopiens, Elian des Egyptiens, Eusebe des Perses, Iosephe des Atheniens, Cæsar de nos anciens Gaulois, & Druides. Les Empereurs, depuis Iule Cæsar iusques à Cōstantin le grand, ont esté Pontifes, d'autres disent iusques à Theodose qui renonça au Pontificat, & reconneut pour pere le Souuerain Pontife de Rome. Et si du depuis les Monarques Chrestiens ne sont pas Prestres, c'est qu'ils reconnoissent Iesus-Christ pour souuerain Pontife: neantmoins ils reçoient l'onction qui est vne participation du sacerdoce, & le Ciel nous a enuoyé vn huile miraculeux pour sacrer nos Monarques, & Loy s'en fut oint comme Roy & Sacrificateur. Mais que deviendra ce Sacrificateur, car il n'a plus d'autel pour y offrir de sacrifices? l'Herésie les luy a abbatus, elle a aplani les Eglises, brisé les Croix, & aboli toutes les apparences de pieté. C'est icy où le zele de mon Prince s'alume; il ne peut point souffrir sans luy rendre la main, les plaintes de l'Eglise dont le mespris scandalisoit les bons, & obstinoit les mechans. Il void que la clemence des Roys qui est vertu és fautes qui regardent les hommes, est impieté és offenses qui vont contre le Createur, & que le Monarque qui ne fait pas regner Dieu dans ses Estats, est indigne de porter Couronne: c'est pourquoy il se met en estat d'aller luy mesme releuer de sa main les Autels que l'heretique auoit mis à fleur de terre. Voyez comme il est bien plus sensible aux offenses de Dieu qu'aux siennes propres: quand il n'y va que de ses interets, & du mespris de son <sup>sa</sup> autorité, d'ordinaire il y enuoye des armées, & chastie les rebelles sans bouger de Paris, il n'estoit pas necessaire, quand Dieu a foudroyé les Geans de la terre, a til pour cela abandonné le Ciel? mais lors qu'il y va de la cause de Dieu, il s'y porte lui mesme en personne, & releue au Bearn en cinq



iours ce que l'Herésie y auoit destruit en cinquante ans. A l'entrée de Pau il refuse le poile, & diët qu'il ne veut point d'honneur où son Dieu n'en reçoit point : que s'il y auoit encor quelque trace d'Eglise il en respecteroit mesme les ruines & y feroit ses deuotions, & que le chemin qu'il prendroit pour monter sur le thronne, seroit de se prosterner au pied d'un Autel. Ah donnez moy vn Ambroise, vn Charles Borromée, vn St. qui ait parlé avec vn plus grand zele de la maison de Dieu; du Bearn il passe à la Rochelle, qui d'une obstination fertile en reuoltes & en impietez, auoit depuis tant d'années refusé le tribut à Dieu & à César; bani de ses murailles l'obeissance avec la Religion. Mon Roy fait triompher son Sauueur plustost que sa personne dans cette ville rebelle & infidelle, & veut luy mesme le suiure a pied, teste nuë, le cierge allumé en la main pour honorer son triomphe. L'exemple de la Rochelle attire apres soy les autres villes dont la Messe estoit banie, & dans ce bonheur general à la France, le Languedoc a receu ce sutcroi de faueur, que nostre Roy roullant sur les traces de son Pere, & instruit par le choi qu'il auoit fait des Prelats qui ont si glorieusement rempli nos Chaires & nos Mitres; a voulu, & a fait que tandis que la terre enuoye les eaux de ses larmes vers le Ciel pour en temperer les ardeurs. *Aqua omnes qua super calos sunt.* Les feux du Ciel sont descendus en cette terre pour en fondre les glaces; & quoy que le Ciel n'ait qu'un Soleil, LOUIS ( Chere Prouince ) t'a donné autant de Soleils que de Prelats pour t'esclairer & te conduire. C'est son zele qui adioust cette faueur particuliere à la generale qui luy a fait releuer les Autels par tout où l'Herésie les auoit abatus. Ville de Montpellier ie ne t'oublie pas, tu es trop proche de mes yeux pour te perdre de veüe : certes quand ie me souuiens de ces années fatales, pendant lesquelles tu estois sans Religion, pour ce que celle que tu auois n'estoit pas veritable, les Eglises abatuës estoient sans prestres, les prestres sans autels, les autels sans sacrifices, & que ie vois cette troupe nombreuse & honorable qui vient flechir les genoux dans ce Temple dont l'herésie auoit fait vn repaire d'hybous & de Corbeaux, quand ie vois tant de frequence des Sacremens, tant de Maisons Religieuses, tant de personnes de condition, qui reconnoissent leur erreur, & releuent les Autels de la mesme main qui les auoit abatus, & sur tout quand ie vois le Corps de mon Sauueur triompher avec pompe

21  
dans les ruës d'une ville qui l'auoit honteusement chassé. ie demande d'où nous vient ce bonheur? quelle main a operé ce prodige? quel bras; quel homme? quel Ange? a restably Dieu & sa religion dans Montpellier, & qu'on me diët que c'est LOUIS LE IUSTE qui n'a battu cette ville de ses foudres de guerre, qui ont desarmé sa rebellion, que pour y faire triompher la verité avec la religion, en y restabliſſant sa puissance, ie dis dans vn transport de ioye, où est donc cette main triomphante & religieuse, afin que ie la baise? Ie veux voir mon Libérateur couronné de Lauriers, pour honorer son zele, & precher sa pieté; Mais ô Dieu; j'entens vne voix coupée de sanglots qui me diët que le poids des Lauriers qui couronnoient son chef l'a courbé & ietté sur vn liët de mort où il est prest à rendre cette ame genereuse. O Dieu que nos ioyes sont courtes! les Couronnes ont la fragilité du verre aussi bien que l'esclar; les bons Princes, comme LOUIS, ont le destin des roses qu'un mesme iour void naistre & mourir, & nos Lys meurent en naissant. Il est vray que son zele ne diminuë point avec sa santé, sa vie a la blancheur de la neige mais non pas la froideur; car le Diuin amour qui brusloit dans son ame, & qui dans des saintes impatiences lui fit dire avec St. Paul, *Cupio dissolui & esse cum Christo*. Tourna ses flammes vers deux Grands de sa Cour, que le malheur de la naissance a mis hors des voyes du Ciel. Oublieux de sa santé, soigneux de leur salut, il leur diët d'une voix mourante & amoureuse, capable d'attendrir les rochers: mes chers amis, m'ayant aymé tout le temps de ma vie, ne souffrez pas que nous soyons eternellement separez apres la mort. O zele! ô charité! & où est le courage braues Heros? vous refusez de suiure vostre Prince qui vous appelle à l'occasion, & à l'occasion du salut eternal; vous auez si genereusement grimpé apres luy sur les breches, herissées de piques, & bordées de canons, & vous disputez maintenant lors qu'il faut aler avec lui cuillir les palmes? vous n'auez qu'un pas a faire pour toucher la Couronne de Iustice que le Ciel ne despart qu'aux guerriers qui auront combatu l'espée à la main & la Croix dans le Cœur. Charité, feu diuin, qui bruslant dans le cœur de mon Prince, auois respondu les cendres sur son visage, & l'auois rendu si jaune & pallissant, qu'il pouuoit dire avec ce St. Monarque dont il portoit le nom, & imitoit la vie, qu'une marque asseurée que Dieu le vouloit faire St. c'est que iamais il n'estoit sain. Enfin Diuin amour tui'as

cué : ô parole bien rude : ô Dieu quelle fatalité m'entraîne ce iour-  
d'huy ! ie ne sçaurois aller à la fin de mon discours, sans aller à la fin  
de mon Prince : mais d'un Prince qui ne deuoit pas mourir si tost, ni  
viure plus long temps : comment mourir si tost un Roy si bon qui  
estoit la gloire & le delice de ce siecle : comment viure plus long  
temps un Roy si bon en un siecle si peruerbi : enfin LOUIS est mort, &  
sa mort a fait mourir celle qui ne viuoit qu'en lui, que pour lui, & qui  
n'auoit d'autre vie que la sienne. Reyne la plus digne d'admiration  
& de compassion qui fut iamais : Princesse la plus vertueuse, & la  
plus infortunée du monde : puis qu'en perdant ton LOUIS tu as per-  
du ce que tu auois de plus cher dans le monde, & que le monde  
possedoit de plus pretieux, ce coup fatal qui a fini sa vie, & ses beaux  
iours, a renouellé en nostre siecle l'histoire tragique du Caluaire,  
ou le Diuin amour d'une mesme atteinte fit deux massacres, car il  
tua le Fils & la Mere, IESVS avec MARIE, & icy l'Espoux & son Es-  
pouse, LOUIS & ANNE meurent d'un mesme coup.

Prouince de Languedoc, Languedoc prouince desolée fais sortir  
de tes yeux de torrens de pleurs que tu verseras sur le tombeau d'un  
Prince qui t'a cheri comme son cœur, Mais non ne pleures pas : suis  
ie pas bien iniuste de demander de larmes à ceux qui n'en sçauroient  
donner : les morts sont ils en estat de pleurer ? & ie ne te cōnois plus  
Languedoc si ie trouue encor sur ton front quelque trace de vie, &  
voyez ma raison. Le Roy est en son Royaume ce que l'ame est dans  
le corps, l'un & l'autre sont la source de tous les mouuemens de vie ;  
c'est pourquoy comme au raport des Medecins, le cœur est le der-  
nier mourant, pour ce que c'est le membre où l'ame exerce les der-  
nieres fonctions de la vie : tu peux dire Languedoc & flatter ton  
malheur de ce haut privilege, que tu as esté le cœur de LOUIS, puis  
que tu as receu les dernieres influāces de vie de cest-ame, & les der-  
niers trauaux de ton Monarque, qui dans la prinse de perpignan a  
usé sa vie pour conseruer la tienne, & assseurer tes frontieres. LOUIS  
donc estant mort, son cœur est il encor en vie ? & si le cœur est mort  
lui qui est le principe de la vie & du mouuement, peut il donner de  
pleurs qui sont le sang & la vie du cœur ? ouy pleure Languedoc,  
mais apres les larmes de douleur que tu as versé plus abondamment  
& plus iustement que tout autre prouince, donne de pleurs de  
ioye, d'autant que ton Roy n'est pas mort, ou s'il est mort comme

vn autre rhœnix il a repris vie dans ses cendres, & dans ce renou-  
 ueau il n'y a eu du changemēt qu'en vn seul poinēt, car LOVIS qua-  
 torse a ſuiui LOVIS treise, le Fils a ſuccedé au Pere, qui l'a fait aſſeoir  
 ſur ſon throſne pour eſtre apres luy le chef de cet Eſtat, ſous la re-  
 gence de la Reyne ſa Mere qui eſt comme le col du corps de cet  
 Empire, par où le chef verſe ſes influances dans les membres; c'eſt  
 pourquoy comme nous voyons que le col naturel qui reçoit toutes  
 les impreſſions de la teſte, & leur ſert de canal, ſepare tout ce qu'il y  
 a de rude, ou de facheux, & le renuoyant dans les autres moins con-  
 ſiderables, reſerue tout ce qu'il y a de doux, de bening, de flatant,  
 & de vital pour le cœur, qu'auiſi tu dois eſperer cher Languedoc,  
 qu'eſtant le cœur de ce corps, le chef verſera par le col ſes plus be-  
 nignes influances dans ce cœur, & que dans l'attente de la paix que  
 tout le monde deſire, reietant ſur les autres parties, s'il y a rien d'aſ-  
 fligeant, LOVIS heureuſement regnant, te departira toute ſorte de  
 douceurs, tendreſſes, & ſoulagemens par les mains de ſa Mere Re-  
 gente, qui te continuant les bontez cordialles que ſon Royal Eſpoux  
 auoit pour toy, t'obligera par vn titre nouveau, à luy contiuer tes  
 vœux, tes reſpects, ta fidelité, & tes obeiſſances.

